

21.8 RAPPORT DEPUTATE VERTALING VAN BELYDENISSKRIFTE, FORMULIERE EN GEBEDE (Artt 96, 181, 326)

- A. Die Rapport word as gestel beskou.
- B. **Besluit:** Die Rapport word verwys na Kommissie Leerstellig 2.
- C. Ds L du P van der Vyver rapporteer namens die Kommissie Leerstellig 2.
- D. **Besluit:** Goedgekeur. Die Ondertekeningformuliere vir Woordbedienaars en proponente ook in die enkelvoud gestel word soos dié vir professore, ouderlinge en diakens, aangesien dit beter pas by die inhoud daarvan.
- E. Die Sinode besluit voorts: Die te benoemde Deputate ontvang opdrag om die Formuliere in al die tale wat in die GKSA gepraat word, te vertaal.

F. RAPPORT

ONDERTEKENINGSFORMULIERE

(Hersiene vertalings – deurgegee aan die kerke vir toetsing)

❖ ONDERTEKENINGSFORMULIER VIR BEDIENAARS VAN DIE WOORD

Ons, ondergetekende bedienaars van die goddelike Woord, wat ressorteer onder die klassis *NN*, verklaar opreg en met goeie gewete voor die Here met hierdie handtekening van ons, dat ons van harte glo en oortuig is dat al die artikels en leerstukke wat vervat is in die Formuliere van **Enigheid**, naamlik die Nederlandse Geloofsbelydenis, die Heidelbergse Kategismus en die Dordtse Leerreëls of Vyf Artikels teen die Remonstrante wat vasgestel is op die Sinode van Dordrecht 1618-19, in alles met die Woord van God ooreenstem. Ons beloof daarom dat ons die bogenoemde leer ywerig sal leer en getrou sal verdedig sonder om openlik of in die geheim, direk of indirek iets daarteen te leer of te skrywe.

Ons sal ook nie alleen alle dwalinge verwerp wat met hierdie leer in stryd is en ook die wat in bogenoemde sinode veroordeel is nie, maar ons is ook geneë om hulle te weerlê, te weerspreek en om alles moontlik te doen om hulle uit die kerk te weer.

As ons ooit enige beswaar of ander opvatting teen hierdie leer mag hê, beloof ons om dit nie openlik of in die geheim in die prediking of skriftelik, bekend te maak, te leer of te verdedig nie. Ons sal dit eers aan die kerkraad, klassis of sinode bekend maak om daar ondervra te word en ons is bereid om ons altyd gewillig aan die oordeel van die kerkraad, klassis of sinode te onderwerp. Ons verklaar dat ons begryp dat indien ons teen bogenoemde optree, ons **metterdaad** van ons dienste geskors sal word.

As die kerkraad, klassis of sinode enige tyd om gewigtige redes ter wille van die eenheid en suiwerheid van die leer van ons 'n nadere verklaring van ons opvatting oor enige artikel van die Gereformeerde belydenis vra, beloof ons ook hiermee dat ons altyd gewillig en bereid sal wees vir die tug soos hierbo bepaal. Ons behou egter die reg van appèl as ons van mening is dat ons miskien deur die uitspraak van die kerkraad, klassis of sinode veronreg is. Gedurende die tyd van appèl sal ons ons onderwerp aan die uitspraak en die oordeel van die Streeksinode.

❖ ONDERTEKENINGSFORMULIER VIR PROPONENTE

Ons ondergetekendes, proponente, verklaar opreg en met 'n goeie gewete voor die Here met hierdie handtekening van ons, dat ons van harte oortuig is en glo dat al die artikels en stukke van die leer wat in die Belydenisskrifte van die Gereformeerde Kerke in Suid-Afrika saamgevat is, in alles met die Woord van God ooreenstem.

Ons verbind ons daartoe om hierdie leer ywerig te leer en getrou te verdedig, sowel wanneer ons geroep word om voor die gemeentes op te tree as andersins, sonder om daarteen

openlik of in die geheim regstreeks of onregstreeks iets te leer of te skrywe en dat ons alle dwalinge sal teëstaan wat met hierdie leer stry en sal help om dit te weer.

Verder beloof ons, as ons enige beswaar mag hê teen hierdie leer of enige punt daarvan, dat ons hierdie beswaar onder die aandag van die Streeksinode sal bring, sodat ons daarvoor geoordeel kan word, terwyl ons bereid is om ons gewillig aan die oordeel van die eerwaarde Streeksinode en verder aan die betrokke kerkraad of klassis te onderwerp.

Ons behou egter die reg van appèl as ons miskien van mening is dat ons deur die uitspraak van die kerkraad, klassis of sinode veronreg is. Gedurende die tyd van appèl sal ons ons onderwerp aan die uitspraak van die Streeksinode

Verder verklaar ons dat, as die Streeksinode of die genoemde kerklike vergaderings te eniger tyd, weens gewigtige redes, dit nodig mag oordeel om, tot behoud van die eenheid en die suiwerheid van die leer, van ons 'n nadere verklaring van ons oortuiging op enige punt van die Gereformeerde belydenis te eis, ons altyd daartoe bereid is.

Ons verklaar dat ons begryp dat indien ons teen bogenoemde optree, ons deur die eerwaarde Streeksinode die reg ontnem sal word om voor die gemeente op te tree.

❖ **ONDERTEKENINGSFORMULIER VIR OUDERLINGE EN DIAKENS**

Ek, die ondergetekende ouderling/diaken van die Gereformeerde Kerk NN verklaar opreg en met 'n goeie gewete voor die Here met hierdie handtekening van my dat ek van harte oortuig is en glo dat al die artikels en leerstukke wat vervat is in die Drie Formuliere van Enigheid, te wete die Nederlandse Geloofsbelydenis, Heidelbergse Kategismus en Dordtse Leerreëls, soos aanvaar in die Gereformeerde Kerke in Suid-Afrika, in alles met die Woord van God ooreenkom.

Ek beloof daarom dat ek, volgens die eis van my amp, die genoemde leer getrou sal handhaaf, verdedig en bevorder, sonder om iets daarteen openlik of in die geheim, direk of indirek te doen, te leer of te skrywe en dat ek alle dwalinge wat teen hierdie leer stry, sal teëstaan, weêrlê en help om dit uit die kerk te weer. Verder beloof ek om enige bedenkinge wat ek teen hierdie leer of teen sekere punte daarvan mag hê, eers aan die kerkraad bekend te maak om daarvoor ondervra te word, terwyl ek beloof om my gewillig te onderwerp aan die oordeel van die kerkraad volgens die bepalinge wat daarvoor in die kerkorde gestel is.

En as die kerkraad te eniger tyd om gewigtige redes, ter wille van die eenheid en die suiwerheid van die leer, dit nodig mag ag om van my 'n nadere verklaring van my opvatting oor enige punt van bogenoemde leer te vra, beloof ek dat ek altyd daartoe bereid sal wees.

Ek behou egter vir myself die reg van appèl as ek miskien meen om deur die uitspraak van die kerkraad veronreg te wees, met dien verstande dat ek gedurende die tyd van appèl my sal onderwerp aan die uitspraak van genoemde vergadering.

Besluit: Goedgekeur. Die Ondertekeningformuliere vir Woordbedienaars en proponente ook in die enkelvoud gestel word soos dié vir professore, ouderlinge en diakens, aangesien dit beter pas by die inhoud daarvan.

Die hersiening van “Enigheid” en “metterdaad” word na die te benoemde Deputate verwys vir finale vasstelling.

Die Sinode besluit voorts: Die te benoemde Deputate ontvang opdrag om die Formuliere in al die tale wat in die GKSA gepraat word, te vertaal.